

Pisortanit pensionisiat pillugit Inatsisartut Peqqussutaata nr. 4-ip, 7. maj 2007-imeersup kingusinnerpaamik 2010-imi upernaakkut inatsisartut ataatsimiinnissaanni 2010-imi atulersussamik allannguutissamik Naalakkersuisut saqqummeeqqullugit peqquneqarnissaannik inatsisartunut aalajangiiffigisassatut siunnersuut, tamatuma kingorna kisimiittunut tunniunneqartartut utoqqalinersiat annerpaat siusinaartumik pensionisialinnut tamanut atuutsinneqalissapput, taassuma saniatigut siusinaartumik pensionisiat inooqatigisap aapparaisalunniit isertitaasa kingunerisaanik ikilisinneqarsinnaajunnaassapput.

(Siumup inatsisartuni gruppia)

Akissuteqaat

(Isumaginninnermut Naalakkersuisoq)

Siullermeerneqarnera.

Qujanaq siusinaartumik pensionisilittatta aningaasaqarnermikkut atugaannik tikkuussisunik, aalajangiiffigisassatut siunnersuutitut saqqummiunneqartunut.

Naalakkersuisut politikkerat, innuttaasut sanngiinnerusut, eqqarsaatigineqarnissaat. Aammattaaq Naalakkersuisut politikkerat, utoqqalinersialittatta aningaasaqarnikkut pitsaasumik toqqissisimanartumillu atugaqartitaanissaat

Siunnersuut inooqatigisap katissimasallunniit isertitarisai pissutigalugit utoqqalinersiat ikilineqartannginnissaannik, aamma utoqqalinersiat tunngaviumik annerpaaffissaasa tamanut atuutsinneqarnissaat, tassa kisimiittuuneq, aappaarneq katissimanerlunniit apeqquaatinnagit, tamatumani Naalakkersuisut oqaatigissavaat, tassalu siunnersuut manna utoqqalinersialinnut minnerpaanik isertitaqartartunut iluaqutaanavianngitsoq. Siunnersuut utoqqalinersialinnut akunnattunik qaffasinnerusunillu isertitaqartartunut iluaqutaassaaq. Tamatuma saniatigut siunnersuut inooqatigiinnut katissimasunullunniit iluaqutitaqassaaq, taakkua aningaasartuutitut tapertariittarmata taamaattumillu inummut ataatsimut kisimiittumut naleqqiullugu aningaasartuutikinnerusarlutik.

Taamaattumik kisimiittut aappariillunniit assigiimmik piniarlugit, pisariaqarpoq utoqqalinersiat amerlassusissaasa assigiinngitsuutinissaat.

Siusinaartumik pensionisiat pisortanit pisartagaapput, illumi inoqutigiit isertitarisaat ataatsimut tunngavigalugit naatsorsorneqartartut. Pisartakkat taakkua annertussusilernissaannut illumi inoqutigiit isertitaasa apeqquaatinneqartarneritut, tunngaviuvoq, isumaginninnermi inatsisip sanarfineqarnerani nalinginnaasumik tunngaviumik isigineqarmat, innuttaasut kikkullunniit pilersuisussaataasut imminnut ilaqtamminnullu. Taamaalliluta tamatta qanigisatsinnut akisussaaqataalluta.

Erseqqissaatigineqassaaq, tassalu malittarisassat atuutsinneqartut kingunerissanngimmassuk, inoqutigiinni, utoqqalinersiallit utoqqalinersiaassaasa aappaasup katissimasallunniit isertitaqarnera pissutigalugu ikilisaavigineqartarnissaat, ataatsimut isigalugu inoqutigiinnit,

tamakkiisumik utoqqalernisialinnit isertitakinnerusut. Akerlianilli. Siusinaartumik pensionisialik aappaasup katissimasalluunniit isertitaqarnera pissutigalugu ikilisaavigitippat, aappariit ataatsimut isertitarisaat inoqutigiinnit, tamakkiisumik utoqqalinersialinnit suli qaffasinnerussapput.

Kinaassusijangaasutut misiginarsinnaavoq, inuunerup sivisunerpaartaani sulisooreersimalluni utoqqalinersiaqalernerme utoqqalinersialittut aappaasup katissimasalluunniit isertitaamik isumalluuteqalerneq. Siusinaartumik pensionisialik minnerpaamik kisimiittumut siusinaartumik pensionisiat 20 %-iinig pisinnaatitaavoq, akileraarutitigut isertitat, tassunga ilanngullugit katissimasap aapparisaalluunniit isertitai tamatumani apeqqutaatinnagit.

Ataatsimut isigalugu Siumup gruppiata siunnersuutaa tungaviumik imminut pilersoqatigiittussaanerup isumaanik, isumaginninnikkut aaqqiussusinerne nalinginnaasumik tunaartarineqartumik malunnaatilimmik allannguuteqartitsissaaq. Siunnersuutit aningaasatigut kingunerisassai eqqarsaatigalugit, tamanna Nunatta karsianut malunnaatilimmik aningaasartuuteqarnerulernerme kinguneqartussaavoq.

Naalakkersuisut nutaat siusinaartumik pensionisialinnut tunngatillugu aaqqiussusseqqinnissaq qangali utaqqineqartoq aallartinniarpaat.

Alloriarneq siulleq tassaassaaq akileraartanermut atugarissaarnissamullu ataatsimiititaliornissaq, tassani aamma siusinaartumik pensionisiaqartut aaqqiussusaanerat misissuisitsinerme suliaqarnerne ilanngunneqassalluni.

Ataatsimiititaliap ilaatigut akileraartanikkut aaqqiussusinerit, ineqarnerme tapiissutit isumaginninnikkut aaqqiussutit qanoq sunniuteqartarnerne misissussavai, tassami ilutigitillugu aamma siunertaammat, sulinikkut imminut pilersornissamut tunngavissaqarnissaa.

2008-imi Ukiakkut katersuunnerme ”Siusinaartumik pensionisiaqartitsineq pillugu nassuiaat - sulisinnaassuseq siusinaartumillu pensionisiaqarneq” Inatsisartut oqallisigaat. Nassuiaammi oqaatigineqarpoq, tassalu siusinaartumik pensionisiallit akornanni sulisinnaassuseqartut sapinngisamik annerpaamik atorluarneqassasut. Nassuiaat ilaatigut siusinaartumik pensionisiat pillugit inatsisissatut siunnersuummik annerusumillu piginnaangorsaaqqittarnissamik iliuusissamik imaqarpoq. Tamanna Inatsisartuni amerlanerussuteqartunit taparserneqarpoq. Nassuiaat manna suleqatigiissitap sulinermine tunngavissaatut ilaatinneqassaaq.

Suleqatigiissitap suliaa saqqummiunneqareerpat, siusinaartumik pensionisialinnut ullutsinnut naleqquttumik inatsisissatut siunnersuummik, tassunga ilanngullugu annertussusiliinissamut najoqqutassatut siunnersuummik saqqummiussaqaarnissartik Naalakkersuisut naatsorsuutigaat, siusinaartumik pensionisiallit sulisinnaajunnaavissornerme imaluunniit annikitsuinnarmik sulisinnaalernerme ilaatigullu sulisinnaassuseqalaarnerme pitsaasumik atugaqaarnissaannik qulakkeerinnittussamik.

Suleqatigiissitap suliaa siusinaartumik pensionisiallit atukkaminneq pitsanngorsaaavigineqarnissaminnut utaqqimaaqqaannginniassammassuk, siusinaartumik pensionisiallit kisimiittut aappariillu pisartagaasa annertussusissaat 13 %-it missaannik qaffaavigineqarnissaat Naalakkersuisut siunnersuutigaat, 1. juli 2010-iimiit atuutilersumik. Tamatuma kingunerissallugu siusinaartumik pensionisiallimmut kisimiittumut qaammammut kr. 1.000-nit missaannik kiisalu aappariinnut qaammammut kr. 1.400-nit missaannik annertunerusunik pisartagaqalerneq.

Naalakkersuisut siunnersuutigineqartut oqallisigineqarluarnissaat qilanaaraat, siunnersuutilli itigartinneqarnissaa inassutigalugu

